

STATÛT ASSOCIAZION FURLANE DONADÔRS DI SANC ODV UDIN

Inzornât ai 27.05.2023

TITUL I – COSTITUZION E FINALITÂTS

1. E je costituide une organizazion di voluntariât clamade Associazion Furlane Donadôrs di Sanc (A.F.D.S.) O.D.V. O.N.L.U.S., cun sede legâl e sociâl a Udin, di cumò indenant indicade dome tant che “Associazion”.

La durade de Associazion e je ilimitade.

2. La Associazion e je un Ent dal Tierç Setôr (ETS) su la fonde dal Decret legjislatîf dai 3 di Lui dal 2017 n.117 e des modificazions e integrazions sucessivis, in plui che dai decretis aplicatîfs sucessîfs. La Associazion e je costituide tant che organizazion di voluntariât (ODV) cun finalitâts civîls, solidaristichis e di utilitât sociâl, tant che segnât tal art. 5 come 1 letare c dal za nomenât D.lgs.117/2017 definît tant che “PRESTAZIONS SOCIOSANITARIIS” (cun riferiment al decret dal President dal Consei dai ministris dai 14 di Fevrâr dal 2001, publicât su la Gazete uffiâl n.129 dai 6 di Jugn dal 2001 e modificazions sucessivis, e indicadis de normative di riferiment L.219/2005 e dal D.M. dai 18 di Avrîl dal 2007).

3. La Associazion e je regolade di chest Statût e e agjîs intai limits des leç europeanis, statâls, regionâls e dai principis gjenerâi dal ordenament juridic, e ancje de normative sul tierç setôr cun riferiment al D.lgs. 117/2017

4. Caratar associatîf:

La Associazion Furlane Donadôrs di Sanc e je apolitiche, apartitiche, aconfessionâl e no à finalitâts di vuadagn, e vûl persegui dome finalitâts di solidarietât sociâl e e je fondade su la partecipazion ative e volontarie dai siei aderents. La Associazion Furlane Donadôrs di sanc e concor ai fins istituzionâi dai Servizi sanitari nazionâl midiant de promozion e dal disvilup de donazion organizade di sanc e de tutele dai donadôrs.

E opere intal teritori de Republiche Taliane.

I contignûts e la struture de Associazion a son democratics, fondâts su principis solidaristics e a permetin la partecipazion efetive di chei che a aderissin ae vite e ae ativitât de associazion.

La Associazion si ispire ai principis de Leç 266/91, in particolâr a ce chel al è previodût tal art. 3, come 3; si adegue e e met in vore ancje ce che al è previodût de normative de L.R. n. 12/95.

5. Finalitâts:

La Associazion e je vierte a ducj, in maniere indistinte; e promôf intal teritori de circoscrizion za provinciâl di Udin la formazion di une “cussience trasfusionâl” e di une culture dal don, di mût che ogni citadin al sinti il dovê uman e sociâl di donâ, almancul une volte ad an, a gratis, in maniere anonime e volontarie, il propri sanc e/o lis sôs componentis.

E fâs, intal ambit des sôs finalitâts, ancje ativitât di educazion ae salût, morâl, civîl e culturâl. Cun di plui, e opere cun ativitâts colegadis ae donazion di sanc e emoderivâts, e ancje inte promozion dal don, intai setôrs sociâl, culturâl, ambientâl, de istruzion, dai dirits civîi, de ricercje scientifiche, de tutele dai utents publics, de solidarietât internazionâl.

La Associazion e va daûr des disposizions di leç in materie sanitarie e di volontariât.

La Associazion no pues fâ ativitâts diferentis di chês listadis parsore.

La Associazion e podarà in ogni câs fâ ativitâts che a àn a ce fâ in maniere direte cun chês istituzionâls, o ancje accessoriis e integrativis di chês stessis, intai limits permetûts dal D.lgjs. dai 4 di Dicembar dal 1997 n. 460 e modificazions e integrazions sucessivis.

6. La Associazion, tal esercitâ la sô ativitât, e je articolade in:

- a) sezions comunâls e frazionâls;
- b) sezions circoscrizionâls e di cuartîr;
- c) sezions aziendâls;
- d) sezions di students;
- e) sezions professionâls.

TITUL II – MIEÇS E STRUMENTS PES FINALITÂTS STATUTARIIS

7. La Associazion no gjestìs in propri la racuelte dal sanc e dai emoderivâts. Tal câs che al sedi domandât des struturis competentis, e pues furnî il supuart logjistic e organizatîf dome cul fin di permeti il funzionament dai servizi di prelêf sedi fis che mobil, su la fonde di une convenzion che e previodi un rimbors totâl des spesis sostignudis. La Associazion e pues aderî a federazions in cjamp regionâl, nazionâl, comunitari e internazionâl che a vedin lis sôs stessis finalitâts.

8. Par rivâ aes finalitâts istitutivis, la Associazion e dore i mieçs che e stime plui adats pe ativitât di clamade dai donadôrs, iniziativis di promozion, comunicazion, divulgazion, informazion.

9. Orghins uficiâi di informazion de Associazion a son il periodic “Il Dono”, il sît internet www.portaledeldono.it

e ancje i *social media* gjestîts de Associazion.

10. Pes sôs finalitâts, la Associazion e dopre lis cuotis fissadis pes donazions di sanc e di emocomponents su la fonde des disposizions di leç in vore, daûr di convenzions di pueste, e ancje contribûts di ents, di privâts, donazions o eventuâi lassits ereditaris.

L'esercizi aministratîf, gjestionâl e fiscâl al scomence il 1ⁿ (prin) di Zenâr e al finis ai 31 (trenteun) di Dicembar di ogni an.

11. Il patrimoni de Associazion al è formât:

- des jentradis che a rivin di contribûts di ents, di privâts, o di eventuâi lassits, e ancje des cuotis fissadis pes donazions di sanc e di emocomponents daûr des disposizions di leç in vore.
- dai bens de Associazion: ducj i bens de Associazion a son listâts intun inventari di pueste, depositât te sede de Associazion e ducj i associâts lu puedin consultâ.

12. Dirits dai Associâts sul Patrimoni Sociâl:

I associâts a àn dirit di cjapâ vision dai ats associatîfs midiant di une domande scrite ae Zonte esecutive provinciâl tai limits previodûts de normative in vore in materie di privacy e di riservatece dai dâts.

I utii o i avanz di gjestion, e ancje fonts, risiervis o capitâl no vignaran distribuîts nancje in forme indirete, dilunc de vite de Associazion, almancul che la destinazion o la distribuzion no sedin imponudis de leç o che a sedin fatis a pro di altris organizazions di volontariât che par Leç, statût o regolament a fasin part de stesste strutture unitarie. Chescj a varan di jessi doprâts dome pe realizazion des ativitâts dal art. 4.

13. Responsabilitât e assicurazion:

La Associazion Furlane Donadôrs di Sanc e rispuint dome dai impegns cjapâts a so non dai orghins statutaris competents, e nissun dai aderents al pues jessi calcolât responsabil par chescj in maniere individuâl.

La Associazion e rispuint, cun bens propriis, dai dams causâts pe inosservance des convenzions o dai contrats stipulâts.

La Associazion, dopo delibare dal consei diretîf, e pues associâsi pai dams.

Ducj i Associâts a son sigurâts pes ativitâts di volontariât che a davuelzin par cont de Associazion, in particolâr par malatie, infortunis e responsabilitât civîl bande tierçs, su la fonde dal D.M. dai 14.2.1992 e su la fonde dal art.18 dal D.lgjs 117/2017.

TITUL III – DIRITS E DOVÊS DAI ASSOCIÂTS

14. I associâts si impegnin a contribuî, daûr des lôr

pussibilitâts, par rivâ aes finalitâts de A.F.D.S.

e a partecipâ aes diversis iniziativis promovudis de Associazion.

15. La Associazion e à cuatri categoriis di associâts:

a) simpatizants

b) associâts par adesion

c) associâts atîfs par donazion

d) associâts benemerits

A son calcolâts simpatizants chei che a aderissin ai ideâi e ai fins de Associazion, ancje se no son Donadôrs.

A son Associâts par adesion chei che, za donadôrs,

– a sedin inatîfs par plui di doi agns e che a vedin otignût almancul il distintîf di bronç

– par motîfs di salût, di là de lôr volontât, a sedin obleâts a sospindi lis donazions di sanc e che a sedin in polse temporanie o in polse definitive

– cui che al à plui di 70 agns (atîfs par donazion ai 70 agns di etât)

A son Associâts donadôrs atîfs chei che, declarâts idonis dal pont di viste fisic al don dal sanc e/o des sôs componentis, a acetin lis normis dal Statût e dai regolaments de Associazion, e ancje ce che al è previodût de legjislazion in vore, baste che no sedin passâts doi agns di cuant che à an fate la ultime donazion.

A son Associâts benemerits de Associazion lis personis fisichis, e ancje i Ents, lis Aziendis, lis Societâts, i Istitûts che a contribuissin in mût significatîf ae realizazion des sôs finalitâts te maniere miôr, baste che a sedin Ents dal Tierç Setôr cence fin di vuadagn e a cundizion che il lôr numar nol sedi plui alt dal cincuant par cent dal numar des organizacions di volontariât. Lis sezions a proponin i benemerits, ricognossûts dopo dal Consei diretîf provinciâl de A.F.D.S. daûr dal regolament di pueste.

16. Si cjape il status di Associât donadôr par donazion

cu la prime donazion di sanc o des sôs componentis,

fate in maniere volontarie e a gratis, e dopo vê ancje esprimude la volontât di aderî ae Associazion Furlane Donadôrs di Sanc.

I Associâts donadôrs atîfs par donazion e i Associâts par adesion a àn dirit di votâ e a puedin

jessi elets pes incarghis associativis.

17. Il status di Associât atîf par donazion si piert

cuant che a sedin passâts, par motîf injustificât, doi agns

de ultime donazion (gjavant chei che a àn za vût

il distintîf di bronç), par dimissions voluntariis o

par un providiment dissiplinâr di espulsion diventât esecutîf

su judizi insindicabil dal Coleç dai Provivîrs.

18. Recès e espulsion:

- La cualitât di associât si piert par muart, dimissions o exclusion;
- Ogni associât al pues, in cualsisedi moment, saltâ fûr de Associazion dant juste comunicazion scrite;
- l'associât che al ledi cuintri dai dovês segnâts in chest statût, che nol rispieti lis disposizions regolamentârs o lis deliberazions dal consei diretîf, che al fasi ativitât in contrast o in concorence cun chê de associazion, al pues jessi escludût de associazion cun deliberazion motivade de Assemblee (o dal Consei Diretîf) su la fonde di un providiment esprimût dal Coleç dai Probivîrs.

TITUL IV – INCARGHIS ASSOCIATIVIS

19. Lis incarghis associativis cun caratar eletîf a durin cuatri agns.

Intes elezions des incarghis sociâls, daûr des modalitâts previodudis dal regolament esecutîf di chest Statût, il vôt al è singul e diret.

Ogni participant aes assembleis eletivis al podarà vê dome une deleghe.

Al è improibît il vôt par corispondence e cun modalitât eletroniche.

20. I components dal Consei diretîf provinciâl a son elets intes zonis rispetivis in assembleis di pueste dai Presidents di sezion e dai Rapresentants di sezion, a lôr volte elets de base dai iscrits su candidaturis presentadis su la fonde dal regolament. La Assemblee provinciâl e cjape at de elezion fate.

Il President de Associazion al ven elet cun vôt singul, segret e diret, de Assemblee provinciâl fra i conseîrs di zone che a vedin acetât la candidature a chê incarghe. Se il conseîr di une zone al è elet President, il so puest tant che conseîr lu cjape il prin dai no elets.

TITUL V – ORGHINS DE ASSOCIAZION

21. A son orghins provinciâi de A.F.D.S.:

- a) la Assemblee dai Presidents e dai Rapresentants des sezions e dai components dal Consei diretîf provinciâl;
- b) il Consei diretîf provinciâl;
- c) la Zonte esecutive provinciâl;
- d) il President;
- e) l'orghin di control e di revision dai conts;
- f) il Coleç dai Probivîrs.

22. Lis sezions, che a son lis formis associativis di base de A.F.D.S.,

si dan dongje tra di lôr su la fonde di zonis teritoriâls, se pussibil omogjeniis, cun entitât determinade dal Consei diretîf provinciâl de Associazion daûr des esigjencis organizativis e funzionâls.

Eventuâls ristrutturazions a àn di jessi fatis almancul trê mês prime des riunions di zone convocadis pe designazion dai candidâts al Consei diretîf provinciâl de A.F.D.S.

23. La Assemblee e je l'orghin primari de Associazion. E je formade dai components dal Consei diretîf e dai Presidents e rapresentants di sezion dai Donadôrs des sezions in regule cu lis disposizions regolamentârs sul dipuesit dai bilançs e sul rinovament des incarghis di sezion. Chescj a puedin delegâ, tal câs di impediment, un conseîr de proprie sezion. I delegâts a consegnaran lis deleghis ae Presidence de Assemblee, prime che a tachin i lavôrs.

Inte Assemblee, ognidun dai Presidents di sezion, dai rapresentants di sezion e dai conseîrs provinciâi al dispon di un vôt.

L'avîs di clamade de Assemblee al varà di jessi mandât ai components cun letare racomandade a man almancul 15 (cuindis) dîs prime de date fissade pe clamade e al varà di vê dentri, di là dal ordin dal dì, la ore de prime clamade e de eventuâl seconde clamade.

Si fasarà la publicitât de clamade tai mieçs di informazion, e in particolâr tal periodic associatîf.

Par che e sedi valide la Assemblee, in prime clamade, e covente la presince di almancul doi tierçs dai components, calcolant lis eventuâls deleghis. La Assemblee e sarà valide in seconde clamade cu la presince de metât plui un dai siei components.

La Assemblee si da adun:

a) almancul une volte ad an, dentri dal mês di Mai, clamade adun dal Consei diretîf provinciâl;
b) cuant che e vegni domandade di almancul un tierç des sezions associadis e funzionantis, o di almancul la metât plui un dai components dal Consei diretîf provinciâl de Associazion. Pes modifichis al statût de Associazion, al covente simpri il vôt favorevul dai doi tierçs dai components efetîfs de Assemblee. Lis deliberazions assembleârs si calcolin aprovadis a maiorange dai presints ae Assemblee, contant ancje lis deleghis.

24. La Assemblee e elei il so President, che al dirêç i lavôrs e che al nomine cinc scrutinadôrs in câs di votazions a scrutini segret.

A son di competence specifiche de Assemblee:

a) la discussion e la aprovazion de relazion morâl cun vôt palês;

- b) la aprovazion dal bilanç consuntîf, dal bilanç di prevision **de relazion di mission e, in câs, dal bilanç sociâl** cun vôt palês;
- c) la designazion de sede dal congrès provinciâl cun vôt palês;
- d) il conferiment al Consei diretîf provinciâl de deleghe pes modificazions ai regolaments cun vôt palês;
- e) la elezion dal President de Associazion cun vôt segret;
- f) il cjapâ at de elezion dai conseîrs provinciâi elets in sede di assemblee di zone;
- g) la elezion dal orghin di control e di revision dai conts cun vôt segret;
- h) la elezion dal Coleç dai Probivîrs cun vôt segret;
- i) l'esam e la aprovazion des modificazions dal statût cun vôt palês;
- j) la indicazion di massime dai criteris pe assegnazion dai ricognossiments individuâi e aes sezions;
- k) la elezion dai scrutinadôrs in ocasion dal rinovament des incarghis associativis di sô competence cun vôt palês;
- y) la proposte e la aprovazion di mozioni cun vôt palês.

25. Par incentivâ la partecipazion dai zovins dai 18 ai 30 agns ae vite associative, e ven costituide une "Consulte dai zovins", cuntun regolament di pueste che al specifiche lis sôs modalitâts di costituzion e lis competencis.

26. Il Consei diretîf provinciâl de Associazion al è formât di un numar di components ecuivalent a chel des zonis, e dal President elet de Assemblee. I Conseîrs provinciâi a vegnin elets intal ambit des Assembleis di zone.

I conseîrs provinciâi no puedin candidâsi e/o cuvierzi lis incarghis politichis segnadis ca sot, pene la decjadence:

- a) sindic;
- b) conseîr e president di un ent aministratîf intermedi;
- c) conseîr, assessôr, president regjonâl;
- d) membri dal parlament e dal guvier nazionâl;
- e) rapresentant di partîts e moviments politics a nivel provinciâl, regjonâl e nazionâl;
- f) diretôr gjenerâl di aziende ospedaliere;
- g) diretôr centrâl al assessorât regjonâl ae sanitât;
- h) diretôr di centri trasfusionâl.

Il Consei diretîf provinciâl de Associazion:

- a) al elei trê vicepresidents sielzintju fra i siei membris;
- b) al opere su la fonde di chest statût e al è invistît dai plui grancj podês di ordenarie e straordenarie aministrazion pal funzionament e pe direzion de Associazion, daûr dai indreçaments dâts de Assemblee;
- c) al determine la percentuâl che e tocje aes sezions

sui contribûts dal Articul 6, daûr des pussibilitâts di belanç;

d) al pronte il belanç consuntîf, il belanç di prevision, **la relazion di mission e, tal câs, dal belanç sociâl**;

e) al ratifiche lis delibaris de Zonte esecutive provinciâl, là che al è previodût, o al pues ancje anulâ, a maiorance, lis stessis delibaris;

f) al fisse la date de Assemblee provinciâl e l'ordin dal dì;

g) al adote e al modifiches, su deleghe de Assemblee, il regolament di atuazion dal statût e chei altris regolaments internis;

h) al delibare la assunzion dal personâl e al fisse la retribuzion;

i) al disfe i conseis di sezion tal câs che no funzionin o par violazion des normis statutariis;

j) al autorize, se al viôt che e je la oportunitât e dopo sintût il parê des sezions de zone interessade, la costituzion di gnovis sezions, aprovant la denominazion;

k) al autorize la unificazion des sezions, sintûts i interessâts;

l) al nomene, cuant che al covente, i comissaris straordenaris intes sezions, sielzintju tra donadôrs che a fasin part de Associazion, che il lôr mandât al durarà al massim sîs mês;

m) al nomene la comission eletorâl, chê dal Fonds di assistance e dutis chês altris comissions, e al fisse il regolament;

n) al nomene il comitât di Presidence, se al covente;

o) al nomene il segretari de Associazion e il segretari econom;

p) al nomene il diretôr responsabil dal orghin associatîf "Il Dono";

q) al autorize il President a stâ in judizi;

r) al nomene il responsabil de gjestion cualitât daûr di ce che al è previodût dal mansionari di certificazion, ancje fra professioniscj esternis ae Associazion;

s) al nomene il responsabil de comunicazion daûr di ce che al è previodût dal mansionari di certificazion, ancje fra professioniscj esternis ae Associazion;

t) al nomene i responsabii de comunicazion dai media in rê;

u) al determine i limits di spese che dentri di chei la Zonte esecutive provinciâl e je autorizade a assumi impegnis di spese urgjents;

v) par dimissions irevocabilis o impediment irreversibil dal President in cjarie, al conferis la incarghe di President al Vicepresident vicjari fin ae prime Assemblee gjenerâl utile pe elezion di un gnûf President.

Il Consei diretîf provinciâl de Associazion si da adun di solit une volte al mês e dutis lis voltis che il President, o almancul la maiorance dai conseîrs, lu stimi

necessari, presentant une domande scrite. Pe validitât des sôs riunions, e covente la presince de maiorance dai conseîrs. Lis deliberazions si cjapin sù a maiorance dai presints e, tal câs di paritât, al prevâl il vôt dal President. Il Conseîr che cence motîf justificât nol intervegna aes sentadis par trê voltis consecutivis, al decjât de incarghe. Lui rimpiaçe chel che i ven daûr inte graduatorie, daûr dal ordin des preferencis otignudis inte zone di apartignince. Tal câs che cui che al ven daûr in graduatorie nol vedi vût vôts, si fâs une gnove votazion inte assemblee de zone interessade pe designazion di un gnûf conseîr che al restarà in carche fin che nol scjât il mandât in cors. Il consei diretîf de Associazion al nomene i rapresentants de Associazion dentri dai diviers orghins di Ents, Comitâts, Comissions, e ancje di Federazions cun caratar regionâl, nazionâl, comunitariis e internazionâls. Ducj i rapresentants de Associazion a designazion direte dal Consei diretîf provinciâl a decjadin cu la scjadince dal stes. Aes sentadis dal Consei diretîf provinciâl a puedin partecipâ, cence drit di vôt e cun funzions consultivis, un rapresentant de Consulte dai zovins, e i rapresentants de Associazion tes federazions nazionâls e regionâls

27. La Zonte esecutive provinciâl e je formade dal President e di trê Vicepresidents, e assistude dal Segretari de Associazion. In vie ordenarie si da adun su clamade dal President e, in vie straordenarie, su domande ancje dome di un sôl component. Lis deliberazions si cjapin a maiorance dai presints e, tal câs di paritât, al prevâl il vôt dal President. Lis assegnazions de Zonte esecutive provinciâl a son:

- a) meti in vore lis deliberazions dal Consei diretîf provinciâl;
 - b) deliberâ in vie di urgjence in materie di amministrazion ordenarie e straordenarie, ancje se dopo il Consei al à di ratificâ;
 - c) cjapâ at de costituzion dai orghins diretîfs des sezions e dal lôr rinovament;
 - d) prontâ l'ordin dal dì pes sentadis dal Consei provinciâl diretîf;
 - e) adotâ proviodiments dissiplinârs cuant che a son urgjents e nol è pussibil dâ adun par timp il Consei provinciâl diretîf. Chescj proviodiments, par jessi valits a varan di jessi ratificâts dal Consei diretîf provinciâl inte prime sentade utile;
 - f) assumi impegnis di spese urgjents intai limits fissâts dal Consei diretîf provinciâl.
- Di ducj i proviodiments adotâts, la Zonte e riferirà al Consei

Provinciâl diretîf inte prime sentade utile dopo de date dai stes providiments.

28. Tal câs che al coventi, il Consei Diretîf Provinciâl al pues nomenâ un Comitât di Presidence componût dal President, di trê Vicepresidents, di doi conseîrs, dal segretari econom e dal segretari, fissant al at de nomine il mandât operatîf specific. Il Comitât al riferîs al Consei su lis sôs ativitâts e al somet a ratifiche lis eventuâls deliberazions cjapadis tal câs di necessitât e urgjence.

29. Il President de Associazion:

- a) al à la rapresentance legâl de Associazion;
- b) al cure la osservance di chest statût;
- c) al sta par cheste in judizi, sedi tant che convignût che tant che atôr, se, in chest secont câs, al à vût il mandât dal Consei diretîf provinciâl;
- d) al clame adun la Assemblee;
- e) al clame adun e al è da cjâf de Zonte esecutive provinciâl;
- f) al clame adun e al è da cjâf dal Consei diretîf provinciâl;
- g) al clame adun e al è da cjâf dal Comitât di Presidence;
- h) al pronte il progjet di bilanç consuntîf e il progjet dal preventîf di someti al esam dal Consei diretîf;
- i) al sorintint al bon andament organizatîf, morâl e culturâl de Associazion, e ancje ai uficis di segretarie;
- l) al nomene il Vicepresident che al varà di cjapâ il so puest tal câs di assence o impediment. Se e mancje cheste designazion, lu sostituîs il Vicepresident plui anzian di etât.

30. Par davuelzi lis lôr ativitâts, i orghins de Associazion a puedin zovâsi di un segretari de Associazion e di un segretari econom. La lôr incarghe e dure cuatri agns e a puedin jessi riconfermâts.

Al segretari de Associazion e al segretari econom, che a puedin jessi sielzûts ancje tra i no donadôrs, si pues ricognossi un rimbors des spesis, cun modalitâts fissadis dal Consei diretîf. Dut câs, chestis incarghis a son incompatibilis cun chês di sezion, di Conseîr provinciâl, Probivîr e Revisôr dai conts e ancje cul jessi furnidôrs di bens e servizis ae Associazion.

Ducj a rispuindin al President, in maniere direte, des lôr funzions.

Cun di plui, la Associazion si zove pe segretarie di personâl dependent, retribuît su la fonde des normis in vore, intal numar e intes funzions che si calcole che a coventin pal bon andament de Associazion. Il tratament economic e normatîf nol varà di jessi plui bas di chel previodût dai contrats coletîfs dal art. 51 dal dl dai 15.6.2015 n. 81

Il Consei provinciâl diretîf al pues deliberâ in materie di salari accessori ai dependents.

Il personâl dependent nol pues assumi, intal ambit de Associazion, incarghis di sezion, di Conseîr provinciâl, Probivîr e Revisôr dai conts de Associazion e, cun di plui, nol pues furnî bens e servizis ae Associazion stesste.

L'ufici di segretarie al rispuint in maniere direte al President e ai Vicepresidents siei delegâts, al colabore cui conseîrs di zone e cui Presidents di sezion pes ativitâts propriis de Associazion e pes iniziativis di ambit provinciâl.

31. La Assemblee associative, su la fonde dal art. 30 dal D.lgjs 117/2017, e nomene un orghin di control e di revision legâl dai conts formât di trê membris efetîfs e doi suplents, e almancul un dai components efetîfs al à di jessi sielzût fra lis categoriis di sogjets dal art. 2397, secont come dal codiç civîl, che si ur apliche l'art. 2399 dal codiç civîl.

L'orghin di control **al vigjile** su la osservance de leç e dal statût e sul rispjet dai principis di corete aministrazion, ancje cun riferiment aes disposizions dal decret legjislatîf dai 8 di Jugn dal 2001 n. 231 - tal câs che si puedin aplicâ - e ancje sul just asset organizatîf, aministratîf e contabil, e sul so funzionament concret. Al esercite ancje il control contabil e al riferîs in sede di bilanç ae Assemblee associative. L'orghin di control al à ancje compits di monitorament de osservance des finalitâts civichis, solidaristichis e di utilitât sociâl, cun atenzion particolâr pai artt. 5,6,7 e 8 dal D.lgjs. 117/2017, e al ateste che il bilanç sociâl al sedi stât scrit daûr des liniis vuide dal art.14 dal D.lgjs. nomenât. L'orghin di control al pues fâ in cualsisedi moment ispezions e controis, e par chest al pues domandâ ai aministradôrs informazions sul andament de Associazion. I associâts, intun numar che nol pues jessi mancul di 50 (cincuante), iscrits ae Associazion, a puedin denunziâ i fats che a stimin censurabii al orghin di control che al à di tignî cont de denunzie inte relazion ae Assemblee. Se la denunzie e je fate di almancul un vincjesim dai associâts, l'orghin di control al à di agjî su la fonde dal art. 2408 secont come dal codiç civîl.

32. Il Coleç dai Probivîrs al è formât di trê membris efetîfs e doi suplents, e al judiche cence apel sui ricors cuintri dai proviodiments dissiplinârs adotâts dal Consei provinciâl diretîf de Associazion.

Cun di plui, al judiche cence apel sui conflits tra i socis

de Associazion in materie statutarie, e ancje sui conflits fra lis sezions e fra lis sezions e i orghins provinciâi de Associazion.

33. Dutis lis incarghis eletivis cjapadis sù dentri de Associazion a son sore nuie, a part il rimbors des spesis sostignudis su la fonde des deliberazions dal Consei diretîf provinciâl de Associazion.

34. Il disfâsi de Associazion al à di jessi deliberât in sede di Assemblee clamade di pueste. I delegâts a varan di rapresentâ almancul i cuatri cuints des sezions e la deliberazion di disfasiment e à di jessi cjapade cul vôt favorevul dai doi tierçs plui un dai delegâts presints che a componin la Assemblee. Se al reste patrimoni, al à di jessi destinât a une associazion dal III Setôr cun obietîfs analics e par finalitâts di utilitât publiche.

TITUL VI – PODÊS DISSCIPLINÂRS

35. Il Consei diretîf provinciâl al judiche e al adote i proviodiments di nature disciplinâr previodûts dal articul sucessîf, sui fats, ats o comportaments contraris aes normis di statût e ai fins istituzionâi de Associazion. La Zonte esecutive provinciâl che e adote proviodiments di nature disciplinârs di urgjence, e je obleade a comunicâju par timp al Consei diretîf provinciâl che, te prime riunion utile, al deliberarà se ratificâ o no chescj proviodiments. No ratificâju al compuarte in automatic la revoche dai proviodiments disciplinârs.

Cuintri dai proviodiments disciplinârs al è ametût il ricors al Coleç dai Probivîrs, che al judicarà cence apel.

36. I proviodiments disciplinârs che a puedin jessi imponûts, valutade la gravitât dai fats, a son:

- a) riclam verbâl o scrit;
- b) censure;
- c) suspension temporanie;
- d) espulsion de Associazion.

TITUL VII – ORGHINS PERIFERICIS

37. La Sezion e je la forme associative di base de Associazion e, ancje se inte sô autonomie, e à di operâ in armonie cui orghins diretîfs de Associazion par otignî lis finalitâts previodudis dal Statût. La sezion no à autonomie juridiche e fiscâl e il so rûl di rappresentativitât de Associazion al è limitât al ambit o teritori là che e opere.

La Sezion, par jessi costituide, e à di rivâ a no mancul di trente gnûfs donadôrs atîfs, che no vegnin

di altris sezions. In câs ecezionâi e motivâts di situaziuns particolârs, il Consei diretîf provinciâl al pues derogâ a cheste cundizion.

38. A son orghins de Sezion;

- a) la Assemblee dai donadôrs atîfs de sezion;
- b) il Consei diretîf di sezion;
- c) la Zonte esecutive di sezion, costituide dal President, dal Vicepresident e dal Rapresentant de sezion;
- d) il President;
- e) il coleç dai Revisôrs dai conts.

39. La Assemblee di sezion si da adun almancul une volte ad an, miôr se dentri dal mês di Avrîl, o cuant che le domandi almancul un tierç dai donadôrs atîfs che a àn drit al vôt, o la maiorance semplice dai membris dal Consei diretîf di sezion. Par clamâle adun e baste la corrispondence normâl.

Pe validitât de Assemblee in prime clamade e je domandade la presince de metât plui un di chei che a àn drit, in seconde clamade la Assemblee e je buine cun cualsisedi numar di presints.

I compits de Assemblee a son:

- a) esaminâ e deliberâ a maiorance dai vôts dai presints sui ogjets metûts tal ordin dal dî dal Consei diretîf di sezion;
- b) esaminâ e aprovâ il bilanç consuntîf e preventîf;
- c) elei i components dal Consei diretîf de sezion in numar minim di cinc conseîrs fin a 50 socis, di siet conseîrs di 51 a 100 socis, nûf conseîrs se a son plui di cent socis. La Zonte esecutive provinciâl de A.F.D.S., su propueste motivate dal Consei diretîf di sezion, e pues autorizâ, par esigjencis organizativis particolârs e di funzionalitât, un numar plui bas di conseîrs fin al minim di cinc, o l'aument fin al massim di vincj par otignî, in chest câs, une rappresentativitât plui largje;
- D) di elei trê membris pal coleç dai Revisôrs dai conts.

Lis sezions cuntun numar di iscrits plui bas di 100 (cent) a puedin nomenâ un sôl revisôr.

40. Il Consei diretîf sezionâl al elei il President, un Vicepresident e ançe un Rapresentant di sezion.

Lis modalitâts di riunion dal Consei diretîf de sezion a son compagnis di chês dal Consei diretîf de Associazion. Il Consei diretîf sezionâl al varà di dâsi adun no mancul di trê voltis ad an.

Il Conseîr di sezion che al mancje cence justificazion par plui di trê sentadis consecutivis, al è sostituît cul prin dai no elets.

Il Consei diretîf sezionâl al opere intal teritori di sô pertinence intal rispiet dal Statût associatîf, lant daûr des indicazions e des diretivis emanadis dal Consei diretîf provinciâl de Associazion.

In particolâr:

- a) al fâs ativitât di propagande e di sensibilizazion par favorî gnovis adesions, in armonie cui criteris adotâts e cu lis disposizions dadis dal Consei diretîf provinciâl;
- b) al sta daûr cun particolâr atenzion ai siei iscrits par che a donin in maniere periodiche il sanc;
- c) al delibare la clamade de Assemblee di sezion;
- d) al segnale, se lu stime oportun, ae Segretarie de Associazion i nominatîfs dai candidâts aes incarghis de Associazion, dopo il consens dai stes;
- e) al cjape ancje dutis chês iniziativis che a coventin par favorî il bon andament de vite associative, par otignî i obietîfs che la A.F.D.S. si da;
- f) al colabore cu la segretarie provinciâl pes incumbencis assegnadis aes sezions;
- g) al viôt di nomenâ, fra i siei components, in câs di dimissions o impediment dal president un gnûf president fin ae scjadince dal mandât in cors.

Il Consei diretîf di sezion si relazione in maniere fisse cul Consei provinciâl elet inte proprie zone. Al segnale, ogni volte che al covente, situazions particolârs che si sedin creadis intal ambit de Sezion.

41. La Zonte esecutive di sezion, orghin dal Consei sezionâl, si da adun su clamade dal President in vie ordenarie, e in vie straordenarie, su domande di almancul un component.

Lis assegnazions de Zonte esecutive sezionâl a son:

- a) deliberâ in vie di urgjence, baste che e sedi la ratifiche dal Consei inte prime riunion dopo che e je adotade la stesse deliberazion;
- b) colaborâ cul President intal davuelzi lis sôs funzions.

42. Il President di Sezion:

- a) al rapresente la Sezion viers di tierçs intal ambit o teritori di competence, di là des prerogativis assegnadis al President de Associazion tant che rapresentant legâl de stesste.

Cheste incarghe e je incompatibile cun chês di Sindic dal Comun là che e à sede la sezion;

- b) al clame adun e al è da cjâf dal Consei diretîf di sezion;
- c) al clame adun la Zonte esecutive sezionâl;
- d) al clame adun la Assemblee sezionâl;
- e) al pronte la propueste di bilanç consuntîf e preventîf;
- f) al sorintint al bon andament morâl e sociâl de sezion,

al cure la osservance des normis statutariis;

g) al è incjariât de gjestion corete dai dâts, e su chei al è tignût ae riservatece. Al è tignût cun di plui al rispiet dai regolaments sul ûs des risorsis informatichis e sul ûs dal social media.

43. Il Vicepresident di sezion al cjape il puest dal President in câs che al sedi assent o che al vedi cualchi impediment.

44. Il Rapresentant di sezion al colabore cul President e cul Vicepresident par mantignî i contats cui donadôrs e pal bon andament de sezion. Al partecipe cun dirit di vôt aes Assembleis associativis e aes Assembleis di zone.

45. Il Segretari di Sezion al ven nomenât dal Consei diretîf sezionâl daûr de propueste dal President e al pues jessi sielt ancje tra i no donadôrs; al reste in carche cuatri agns.

Nol à dirit di vôt, almancul che nol vedi ancje la incarghe di conseîr di sezion.

46. Il coleç dai Revisôrs dai conts al à il compit di controlâ la gjestion contabile e di riferî ae Assemblee sezionâl.

Lis seziions cun mancul di 100 adesions a àn facultât di elei un sôl revisôr dai conts pe verifiche contabile.

47. L'eventuâl disfasiment de sezion al à di jessi deliberât in sede di assemblee sezionâl. I presints a chê assemblee a varan di rapresentâ almancul i cuatri cuints dai socis che a àn dirit al vôt, e la deliberazion e varà di jessi cjapade cul vôt favorevul dai doi tierçs plui un dai presints.

Ae tierce clamade de Assemblee sezionâl par deliberâ sul disfâsi de sezion, e bastarà la maiorance semplice dai presints.

Deliberât il disfasiment de sezion, la Associazion e nomenarà un o plui licuidadôrs che a passaran lis eventuâls ativitâts esistentis ae Associazion, che lis tignarà in dipuesit par almancul doi agns dal moment che la Sezion si è disfate. Intal câs di ricostituzion de Sezion, la Associazion e varà di riconsegnâ a cheste lis ativitâts metudis in bande. Passât il tiermin di doi agns cence che e sedi ricostituide la sezion, lis ativitâts metudis in bande a saran destinadis de Associazion aes ativitâts che e je finalizade. La Sezion e ven comissariade dal Consei diretîf provinciâl de Associazion intai câs:

a) di inosservance dal Statût;

b) di comprovade inativitât complete par plui di doi agns;

c) di lesions gravis ae reputazion dal sodalizi.

Cuintri cheste decision al è ametût ricors al Coleç dai Probivîrs dentri di vot (8) dîs.

TITUL VIII – BELANÇ

48. Belanç consuntîf e preventîf:

- Il belanç de Associazion al è anuâl e al decor dal 1ⁿ di Zenâr ai 31 di Dicembar di ogni an;
- I belançs consuntîf e preventîf a son prontâts dal consei diretîf e depositâts te sede sociâl de Associazion, almancul 30 dîs prime de Assemblee che e varà di aprovâju. Copie dai Belançs e pues jessi visionade di ducj i aderents li de sede associative. I belançs des sezions a son prontâts doprant il strument di pueste metût a disposizion online e mandâts ae segretarie provinciâl in cheste modalitât, fate salve la copie su cjarte firmade dal President e dai Revisôrs dai conts. I eventuâi utii o avanz di gjestion a varan di jessi doprâts dome par realizâ lis ativitâts dal art. 4.

TITUL IX - NORMIS TRANSITORIIS E FINÂLS

49. La atuazion dal Statût e je demandade a un Regolament associatîf modificabil dal Consei diretîf provinciâl su deleghe de Assemblee. Par jessi validis, lis modificazions a varan di vê il consens de metât plui un dai conseîrs che a votin.

50. Par dut ce che nol è previodût di pueste di chest statût in materie associative, si rimande aes normis dal Codiç civil e ae normative specifiche su lis ONLUS, e ancje, in materie di donazion dal sanc e des sôs componentis, aes normis legjislativis e sanitariis in vore. Il rimant a leçs e regolaments fat di chest Statût si intint fat al test in vore dai stes, cjapadis dentri lis modificazions e integrazions intervignudis dopo de lôr emanazion. La denominazion associative che e cjape dentri l'acronim ETS e sarà integrate te date di iscrizion de Associazion intal Regjistri Unic Nazionâl dal Tierç Setôr (RUNTS)

ooo